

beant ullos libros legere, quibus integritas fidei, vel morum puritas facilè corrumpi potest; atque imprimis ne indiscriminatim legant amatorias illas fabulas quas *Novels* vocant. Meminisse ipsimet Fideles continuò debent, quantâ cum severitate Ecclesia Spiritu sancto directa, omnibus temporibus proscripserit omnia scripta, quæ eò tendunt ut aliquid de summâ reverentiâ sanctissimæ nostræ Religioni debitâ detrahant.

10. DE LIBERIS MURATORIBUS.

ARCHIEPISCOPUS et Episcopi injungunt omnibus Sacerdotibus qui in ipsorum Diœcesibus sacrum exercent Ministerium, ut Pœnitentiæ et Eucharistiæ sacramenta non administrent iis qui publicè cognoscuntur pertinere ad societatem Liberorum Muratorum, nisi positivè promittant se non ampliùs adituros esse illorum conventus (*Lodges*), nec unquam professuros se ad illas societates ullo modo pertinere. Insuper Pastores sæpè admonebunt populum fidelem ipsis commissum, ut inire consortium cum hujusmodi Societatibus cautè devitet.

- † JOANNES, *Arch. Balt.*
- † LEONARDUS, *Episc. Gortyn.*
- † MICHAEL, *Episc. Philad.*
- † JOANNES, *Episc. Bost.*
- † BENEDICTUS, *Episc. Bard.*



CONCILIUM
BALTIMORENSE
PROVINCIALE I,

HABITUM

ANNO 1829.

CONCILIIUM PROVINCIALE I,
BALTIMORI HABITUM MENSE OCTOBRI,
ANNO 1829.

EPISTOLA DEDICATORIA

*Primæ hujus Concilii editionis, quæ Baltimori pro-
diit statim post ejusdem Concilii approbationem.*

BEATISSIMO AC SANCTISSIMO
PATRI
GREGORIO XVI PONTIFICI MAXIMO,
ARCHIEPISCOPUS BALTIMORENSIS, CETERIQUE
FEDERATÆ AMERICÆ PRÆSULES.

BEATISSIME PATER,

SIMUL atque inscrutabili Divinæ Providentiæ ju-
dicio, ac sanctæ Sedis auctoritate, Episcopali
munere fungi cœpimus, nihil antiquius habuimus
quàm ut veræ Fidei propagationi, ac Disciplinæ,
quæ SS. Pontificum decretis sacrisque canonibus
esset conformis, stabiliendæ, nisu toto incumbere-
mus. Ad hæc porrò sanctarum synodorum celebra-
tionem multùm conferre probè scientes, Baltimorum
convenimus, et Concilium Provinciale primum men-
se Octobri anno 1829 habendum indiximus.

Sancti hujus Concilii, Apostolicâ auctoritate fir-
mati Decreta, Romam ad SS. D. N. PIVM fel. rec.
PP. VIII transmissa, Beatissimi Patris approbatione

munita, ac roborata ad nos tandem redierunt. Eadem igitur in lucem edituri, unà cum aliis documentis, quæ successoribus nostris in posterum necessaria, aut certè perutilia fore confidimus, Opusculum tibi, **SANCTISSIME PATER**, dicatum et volumus, et facimus. Id namque postulat summus honoris et jurisdictionis Primatus, quo Universali Ecclesiæ præes, ac moderaris; suadet plurimorum recordatio meritorum, quibus, etiam cum in minoribus ageres, tuam erga nos benevolentiam sæpissimè testatus es; impulit nascentis in hisce regionibus Ecclesiæ decus, honos et incrementum. Posteris enimverò, **BEATISSIME PATER**, jucundum præclarumque hac nostrâ agendi ratione exemplum relinquemus: cum scilicet novi orbis Præsules veterum inhærentes vestigiis intuebuntur, atque ad Romani Pontificis pedes provolutos, laborum suorum confirmationem, iisdemque sibi ab altâ Petri Sede Apostolicam Benedictionem efflagitantes.



PROŒMIUM.

POST acceptam ab Apostolicâ Sede facultatem omnia jura Metropolitana exercendi, etiam ante Pallii receptionem, Illm̄us et Revm̄us Archiepiscopus Baltimorensis, **JACOBUS WHITFIELD**, litteris suis mense Decembri anno 1828 datis, Præsules Provinciæ Baltimorensis ad Concilium, die primâ mensis Octobris anno 1829, in ipsâ Urbe Baltimoro celebrandum convocavit. Revm̄um quoque Episcopum Sancti Ludovici, Neo-Aureliæ administratorem, **S. Sedi** immediatè subjectum, eo quòd Diœceses quibus præest intra Fœderatæ Americæ limites sitæ sint, invitavit ut, salvis ceteroquin suis privilegiis, Concilio interesset. Præsules Archiepiscopi votis læti et alacres annuere. Adfuerunt igitur:

Illustrissimus Archiepiscopus Baltimorensis, **JACOBUS WHITFIELD**, consecratus anno 1828, die verò Maii 25;

Revm̄us Episcopus Bardensis, **BENEDICTUS JOSEPH FLAGET**, consecratus die 4 Novembris anno 1810;

Revm̄us Episcopus Carolopolitanus, **JOANNES ENGLAND**, consecratus die 21 Septembris anno 1820;

Revm̄us Episcopus Cincinnatensis, **EDUARDUS FENWICK**, consecratus die 13 Januarii anno 1822;

Revm̄us Episcopus Sancti Ludovici, Administrator Neo-Aureliæ, **JOSEPH ROSATI**, consecratus die 25 Martii anno 1824;

Revñus Episcopus Bostoniensis, BENEDICTUS FENWICK, consecratus die 1 Novembris anno 1825;

Admodum Reverendus GULIELMUS MATTHEWS, Vicarius Generalis Apostolicus Philadelphiensis constitutus à Sede Apostolicâ, die 26 Februarii anno 1828.

Aberant Revñi DD. JOANNES DUBOIS, Episcopus Neo-Eboracensis, et MICHAEL PORTIER, Episcopus Mobiliensis, qui trans mare iter antea aggressi, ab Europâ nondum reversi fuerant. Revñus quidem Episcopus Neo-Eboracensis Procuratorem constituerat Revñum D. JOANNEM BAPTISTAM DAVID, Episcopi Bardensis Coadjutorem; sed ob adversam valetudinem, nec ipse potuit adesse.

ACTA CONCILII.

CONVENTUS PRÆPARATORIUS.

DIE ultimâ Septembris, Anno 1829, convenerunt Præsules in Ædibus Archiepiscopalibus; atque de creandis Officiariis seu adjutoribus Concilii, de Theologis et Canonistis assumendis, de Sessionibus et Congregationibus habendis, deque tandem regulis nonnullis quibus Concilio ritè incipiendo ac celebrando consuleretur, egerunt. Quocirca sic placuit Patribus:

1. Nihil sancietur, quod executioni mandari facile non possit. 2. Nullum decretum prælo subjicietur, quin prius S. Sedis approbatione firmatum fuerit. 3. Nihil ad Synodum referetur, præter ea quæ Illñus D. Archiepiscopus Baltimorensis, consentientibus Revñis hujus Provinciæ Præsulibus, tractanda esse judicaverit, nisi duabus tertiis partibus Prælatorum

aliter visum fuerit. 4. Sessiones manè horâ decimâ, Congregationes autem vespere horâ quartâ habebuntur, nec ultra spatium trium horarum protrahentur. 5. Prima Sessio habebitur Dominicâ primâ Octobris proximè sequentis, in Ecclesiâ Metropolitanâ, post Pallium Illñi D. Archiepiscopo Baltimorensi ab Revñi Episcopo Bostoniensi, intra Missarum solemnias, traditum. Quoniam verò Congregationes convenit Sessionibus præire, prima Congregatio habebitur præcedenti Sabbato, die scilicet tertiâ Octobris. 6. A die quartâ ad decimam usque diem Octobris, Missam solemniter celebrabit unus ex Concilii Prælati, ordine suprâ commemorato: Revñi autem Episcopi Carolopolitanus et Bostoniensis brevem ad populum concionem, alternis vicibus, habebunt. 7. Illñus D. Archiepiscopus, ex sententiâ Prælatorum, constituit Promotorem Revñum D. B. FENWICK, Episcopum Bostoniensem. Deinde Rev. D. Magistrum J. B. L. EDUARDUM DAMPHOUX, in Marianâ Facultate sacræ Theologiæ Baltimorensi Licentiatum, Secretarium Concilii designavit, eique adjutorem dedit Rev. D. FRANCISCUM P. KENRICK. Postremò Magistrum Cæremoniarum Rev. D. JOANNEM J. CHANCHE, eligendi sibi adjutorem potestate concessâ; Rev. verò DD. FRANCISCUM LHOMME et JOANNEM RANDANNE Cantores nominavit. 8. Tandem ad Synodum invitati sunt spectatissimi viri, quorum nomina sequuntur:

Admodum Reverendus Pater FRANCISCUS DZIEROZYNSKI, Superior Societatis Jesu in Americâ Fæderatâ, et admodum Reverendus JOSEPH CARRIERE, Visitor Societatis Sancti Sulpitii.

Admodum Reverendus D. JOANNES TESSIER, Vicarius generalis Archidiœcesis Baltimorensis, et Marianæ Facultatis Sacræ Theologiæ Baltimorensis venerandus Decanus;

Reverendus D. LUDOVICUS R. DE LUOL, Superior Seminarii S. Sulpitii Baltimorensis, et Marianæ Facultatis Sacræ Theologiæ Baltimorensis venerandus Syndicus;

Reverendus D. JOANNES BAPTISTA LUDOVICUS EDUARDUS DAMPHOUX, Marianæ Universitatis Amplissimus Rector;

Reverendus D. FRANCISCUS PATRITIUS KENRICK, ab Episcopo Bardensi adductus Theologus;

Reverendus D. SIMON GABRIEL BRUTÉ, ab Episcopo Carolopolitano designatus Theologus;

Reverendus D. LUDOVICUS DE BARTH, ab Episcopo Cincinnatensi designatus Theologus;

Reverendus D. AUGUSTUS JEANJEAN, ab Episcopo Sancti Ludovici adductus Theologus;

Reverendus D. ANTONIUS BLANC, ab Episcopo Bostoniensi designatus Theologus;

Reverendus D. MICHAEL WHEELER, à Vicario generali Apostolico Philadelphensi designatus Theologus.

Theologi Metropolitanæ Ecclesiæ Baltimorensis nominati.

PRIMA CONGREGATIO PUBLICA,

HABITA IN ECCLESIA METROPOLITANA, DIE TERTIA OCTOBRIS.

IN nomine sanctæ et individuæ Trinitatis, Patris, et Filii, et Spiritûs Sancti. Amen. Anno Domini

millesimo octingentesimo vigesimo nono, Pontificatus SSmi Dni nostri Pii divinâ Providentiâ PP. VIII primo, die tertiâ Octobris, Congregatio publica habita fuit in Ecclesiâ Metropolitanâ Baltimorensi, cui præfuit Illm̄us ac Revm̄us D. Archiepiscopus, JACOBUS WHITFIELD. Adfuerunt Revm̄us D. Episcopus Bardensis, BENEDICTUS JOSEPH FLAGET, antiquior Suffraganeus; Revm̄us D. JOANNES ENGLAND, Carolopolitanus; Revm̄us D. EDUARDUS FENWICK, Cincinnatiensis; Revm̄us D. JOSEPHUS ROSATI, S. Ludovici; Revm̄us D. BENEDICTUS FENWICK, Bostoniensis Episcopus; qui omnes juxta ordinem consecrationis consedere: et ultimo loco admodum Reverendus D. GULIELMUS MATTHEWS, Vicarius Generalis Apostolicus Philadelphensis. Aderant etiam Superiores Ordinum, Doctores et Theologi in conventu præparatorio nominati. Episcopi omnes, et Mariani Doctores rochetto et mozzettâ, ceteri verò Sacerdotes superpelliceis induti erant.

Implorato divino auxilio, flexis genibus, per Antiphonam *Veni sancte Spiritus*, &c. et Orationem convenientem, Illm̄us D. Archiepiscopus ea denuntiari jussit, quæ de Officiariis, Theologis, Canonistis, ac ceteris ad Concilium spectantibus statuta jam fuerant in prædicto conventu Prælatorum.

Deinde indictâ primâ Sessione ad diem Dominicam proximè sequentem, et Antiphonâ *Sub tuam* flexis genibus recitatâ, omnes discesserunt.

SESSIO PRIMA.

ANNO Domini millesimo octingentesimo vigesimo nono, die mensis Octobris quartâ, quæ fuit Dominica, habita est prima Sessio in Ecclesiâ Metropolitanâ Baltimorensi.

Horâ decimâ, Revm̄us D. Archiepiscopus pontificalia, Episcopi verò pluvialia supra rochetum induerunt cum mitris; Vicarius generalis Apostolicus pluviale absque mitrâ; Doctores, Theologi, aliique Sacerdotes sacerdotalibus indumentis ornati adstiterunt dum Sacrum ab Revm̄o Archiepiscopo fieret. Post Sacrum, concionem ad populum habuit Revm̄us Episcopus Carolopolitanus; quâ finitâ, Pallium Revm̄o Archiepiscopo ab Revm̄o Episcopo Bostoniensi usitatâ formâ traditum est.

Deinde aperta est Synodus more solemnî, servatis omnibus quæ in Pontificali Romano præscribuntur: atque Illm̄o D. Archiepiscopo interrogante: *Reverendissimi Patres, venerabiles Fratres, placetne vobis ad Dei gloriam et honorem, et ad Catholicæ Ecclesiæ amplificationem, Concilium Provinciale BaltimoreNSE legitimè convocatum, et hic congregatum, hodierno die aperiri, et inchoari?* Singuli responderunt altâ voce: *Placet, aperiatur.* Illm̄us igitur D. Archiepiscopus, tam suo quàm Coepiscoporum nomine, ita ad populum conversus pronuntiavit: *Christi nomine invocato, decernimus sanctam Synodum Provinciale BaltimoreNSE esse apertam, et ita judicamus.*

Deinde Revm̄us D. Archiepiscopus mandavit eorum nomina per Secretarium legi, quos ipse tanquàm Concilii Officiarios proponebat; quibus perlectis, ad Revm̄os Coepiscopos conversus, ita interrogavit:

Placetne vobis, venerabiles Fratres, hosce in Concilii Officiales eligendos? Et Episcopi singuli responderunt: *Placet.* Secretarius itaque Decretum legit, his verbis: *Revm̄us D. Archiepiscopus BaltimoreNSis, unâ cum Episcopis in hoc sacro Concilio*

congregatis, decernunt hosce Reverendos viros in Officiales hujus sancti Concilii eligendos esse, et legitimè jam electos, nempe: Promotorem, Revm̄um D. B. FENWICK, Episcopum Bostoniensem; Secretarios, Reverendos DD. EDUARDUM DAMPHOUX, S. T. D. et FRANCISCUM P. KENRICK; Magistrum Cæremoniarum, Rev. D. JOANNEM JOSEPH CHANCE; Cantores, Reverendos DD. FRANCISCUM LHOMME et JOANNEM RANDANNE.

Postea Revm̄us Promotor Revm̄um D. Archiepiscopum allocutus est his verbis: *Illustrissime ac Reverendissime Domine, peto ut legantur decreta Concilii Tridentini de Professione fidei, et de Residentiâ.* Tum versus ad Revm̄os DD. Coepiscopos Illm̄us D. Archiepiscopus, ab his siscitatus est his verbis: *Venerabiles fratres, placetne vobis ut legantur decreta Concilii Tridentini de Professione fidei, et de Residentiâ?* Et singuli responderunt: *Placet, legantur.* Prædicta igitur decreta ab Archidiacono altâ voce lecta sunt. (*De Prof. fidei, Sess. 25, Cap. 2 bis de Ref. Cogit, etc. De Resid. Sess. 6, Cap. 1, de Ref. Eadem S. Synodus, etc. et Sess. 23, Cap. 1. de Ref. Cùm præcepto, etc.*)

Quibus peractis, Revm̄i Provincialis Synodi Patres, fidei Professionem emisere juxta formam in Pontificali Romano positam: ac demùm proximâ Congregatione ad diem sequentem indictâ, Illm̄us ac Revm̄us D. Archiepiscopus Clero ac populo solemniter benedixit, omnesque domum se receperunt.

Horâ quartâ postmeridianâ, Vesperæ solemniter cantatæ sunt: Revm̄us Episcopus Bostoniensis concionem habuit, post quam benedictio SS. Sacramenti data est.